



## Notat

Dato: 15.05.2017  
Arkivsak: 2014/23406-8  
Saksbehandlar: sisover

---

**Til:** Yrkesopplæringsnemnda  
Utval for opplæring og helse  
Fylkesutvalet

---

**Frå:** Fylkesrådmannen

---

### Statusrapport samanslåing Etne/Ølen

Førre statusrapport vart levert fylkestinget i mars 2017. Den tok for seg klassesaka i Rogaland fylkeskommune og vedtaket om å gje alle tilbod som i dag vert gitt ved Etne vidaregåande skule (vgs) i Ølen. Samstundes vart det gjort greie for samarbeidet mellom skulane for å sikre god søking til tilboda og arbeidet i omstillingsutvalet ved skulen i Etne.

Fylkesrådmannen viser også til følgjande oversendingsforslag i fylkestinget 7. mars 2017 frå Siri Klokkerstuen, Benthe Bondhus og Mari Klokkerstuen Kjellesvik:

«Hordaland fylkesting er uroa over arbeid for dei tilsette ved Etne vidaregåande skule når skulen vert slått saman med Ølen vidaregåande skule. Det er ingen vidaregåande skular i Hordaland i naturleg pendlaravstand. Fylkestinget oppmodar om å inngå best mogleg avtalar med Rogaland fylkeskommune på vegner av våre elevar og tilsette. Fylkestinget vil oppmoda om at ein i det vidare arbeidet legg stor vekt på at dei tilsette ved Etne vgs må få tilbod om vidare tilsetjing ved Ølen vgs så langt det er råd.»

Våren 2017 har møtearenaene som vart etablert hausten 2016, vorte vidareført. Det gjeld mellom anna samarbeidet mellom dei to fylkeskommunane og dei to vidaregåande skulane. Hovudtyngda av arbeidet har vore knytt til omstillingsarbeidet på Etne vgs.

Det var knytt ei uvisse til om innsøkinga til tilboda i Ølen ville vere god nok til at alle Etne-tilboda kunne verte vidareført. På møte i inntaksnemnda for Rogaland fylkeskommune 17.03.17 vart det vedteke å vidareføre alle tilboda. I nokre tilfelle er det snakk om halve klassar på grunn av låge søkartal, men alle kjem i gang. Tilboda for Vg1 Teknisk og industriell produksjon (TIP), Vg2 Kjøretøy og Arbeidsmaskinar vil bli gitt ved Tesdal som Rogaland fylkeskommune har leigd ut våren 2019. Då vil nytt bygg stå ferdig i Ølen og Vg1 TIP og Vg2 Arbeidsmaskinar vil verte flytta dit, mens Vg2 Kjøretøy vert samla i Haugesund.

Samarbeidet mellom dei to skulane for å sikre gode søkjartal har ført fram. Ølen vgs hadde over 350 søkjarar til skuleåret 2017-2018, dvs. om lag 80 elevar meir enn vanleg. Det at Ølen vgs no vert ein større skule, gjer det meir sannsynleg at tilboda vil kunne vere stabile over tid, og at skulen vil kunne verte ein

sterk regionskule. Leiinga og elevråda ved dei to skulane har samarbeidd denne våren for å leggje til rette for ein god overgang for elevane.

Ølen vgs lyste ut om lag 13 stillingar i slutten av januar; av desse var 11 faste stillingar og to heile stillingar som vikariat. Hovuddelen av desse stillingane var knytt til dei nye tilboda som skulen skulle gje, men nokre var grunna i permisjonar, avgang o.l. Skulen fekk over 160 søkjarar til stillingane, av desse var 11 frå Etne vgs. Alle søkjarar med rett formalkompetanse frå Etne vgs vart invitert til intervju, og det enda med at noko over halvparten av dei ledige stillingane gjekk til Etne-lærarar.

Møta i omstillingsutvalet har vore gjennomført i høve plan med om lag eit møte kvar 6. veke. I utvalet har personalarbeidet vore det viktigaste. I mars vart det gjennomført det andre fellesmøtet for alle tilsette. På dette møtet vart regelverk og rutinar for tilsette i omstilling tatt opp på nytt. I løpet av april vart det gjennomført individuelle samtalar med alle og protokollar skrivne. Det vil seie at for dei fleste vart det gjort avtale om avslutning av arbeidstilhøvet i Hordaland fylkeskommune (HFK). I tillegg vart tre permisjonssøknader innvilga. Fylkesrådmannen har utvida fortrinnsretten til ny stilling i HFK til å gjelde i 18 månader for tilsette ved Etne vgs; ordinært gjeld denne retten i 12 månader.

Parallelt med personalarbeidet har det vore arbeid med katalogisering av eignelutar ved skulen og med elev- og tilsettearkiv. Dette arbeidet har vore følgd opp av ulike faglege avdelingar i HFK. Hovuddelen av inventaret vil gå til Odda vgs.

Det som no står att, er evalueringa av arbeidet som har vore gjennomført. I omstillingsmøta vert arbeidsmiljøet fortløpande evaluert, i tillegg skal alle tilsette bli spurt om deira syn på oppfølging, informasjon og støtte dei har fått undervegs dette skuleåret. Denne sluttevalueringa vil vere tema på siste omstillingsmøtet 13. juni. Dei siste vekene av skuleåret vil skulen arrangere avslutningar for tilsette og elevar. Det som står att av praktisk arbeid, vil opplæringsavdelinga og egedomsavdelinga følgje opp.